

周易史證

附易傳偶解
閩錫山書齋



(一)



山西省文獻委員會編

山右叢書初編

趙戴文題



編校姓氏

山西省文獻委員會總裁

閻錫山 百川

副總裁

趙戴文 次隴

徐永昌 次宸

常務委員

郭象升 允叔

馬駿 君圖

陳敬棠 芷莊

委員

賈景德 煜如

張友桐 曉琴

常贊春 子襄

狄樓海 觀滄

李鏡蓉 亮工

陳受中 乙和

邵修文 竹翠

陸近禮 恭齋

高時臻 福齋

李尙仁 綢卿

甯超武 子高

賈昭德 宜之

徐鴻寶 森玉

任晰 亮裁

常乃惠 燕生

趙正楷 法真

方聞 彥光

顧問
編纂

田九德 玉如

原士才 石民

總幹事 于萬河 霞裳

幹事 焦陽三 養三

范士元 周君

常乃純 价中

校對 武敘疇 洪九

陳秀彥 元生

郭長民 漢鼎

邢淵經 伯涵

劉受福 百之

周易史證序

易之興當殷之末世周之盛德當文王與紂以_之事其辭多危其要无咎其中如帝乙歸妹高宗伐鬼方箕子文王之明夷經也而以史緯之而包犧神農黃帝堯舜之制作又特詳於繫傳蓋推天道明人事至精至深至繁至蹟於道無所不該而六十四卦之大象皆有君子以之文其三百八十四爻之吉凶悔吝則彙括數千百年得失善敗之林以垂爲炯戒即以作史觀可也自漢及宋譚易者主象主數主理派分爲三漢學中惟鄭康成間引古事以證爻象迄宋李光作讀易詳說卦爻之辭悉就君臣立言證以史事維時光以論和議被謫嶺南故於當世之治亂一身之進退三致意焉觀其所上疏云淮甸咫尺了不經營長江千里不爲限制未聞專主避敵如今日者然則其退而著書非隱以綱維宇宙爲己任能深切著明若是哉而或且以牽合病之謬矣其後與光書同例者則惟楊文節公易傳亦依程氏本旨雜引史傳爲證文節於開禧間聞北

伐起釁憂憤以終雖書之徵引不同而其綱維宇宙之心則一也後世講易諸家非雜入禳祥則務窮造化率於治平之要鮮所發明其與佛氏傳心道家丹訣亦何以異視李與楊之綜覈人事以求實用其得失爲奚若哉今讀荷村先生所撰周易史證一編於觀象玩辭之中寓以古爲鏡之意大有裨於世道人心使讀是編者隨時觀省各存綱維宇宙之心吾知其遠勝於高談元渺無裨時事者非可以道里計矣先生遭逢聖世歸老林泉扶世翼教其所遇與李楊異然辭多危而其要无咎古聖人當周之盛德猶時深兢惕之思則矚括數千百年得失善敗之林以垂爲炯戒此其意未可一日廢也先生是編以之闡明經學也可以之驅遣史才也可即以之潤色我國家億萬年隆平之鴻業也亦無不可讀竟綴數言歸之以誌欽慕云

六籍莫古於易又以卜筮之書未遭秦燄故自兩漢以來傳者相承班范書所載可考也然多明象占至王輔嗣始言理而孫盛已非之盛之言曰易之爲書窮神知化非天下之至精其孰能與於斯世之注解殆皆妄也况弼以附會之辨而欲籠統元旨者乎故其叙浮義則麗辭溢目造陰陽則妙蹟無間至於六爻變化群象所馭日時歲月五氣所推弼皆擯落多所不關雖有可觀者焉恐將泥夫大道由盛之言則以象數爲重矣夫聖人設卦觀象繫辭焉而明吉凶則象數者作易之由而理實象數之本也舍理而專言象數如焦京輩所習其言亦不必盡驗則易者只用之風角占卜而已聖人以易爲寡過之書於卦爻之吉凶悔吝無不揭其故以示後世俾讀者因爻位所值以自考其行事之得失是易乃脩身立德之書豈僅占卜已哉昔鐘士季之母張夫人涉歷衆書特好易每讀孔子說鳴鶴在陰勞謙君子藉用白茅不出戶庭之義使曾反覆讀之曰易三百餘爻聖人特說此者以謙恭慎密樞機之發行已至要榮身所由

故也順斯術以往足爲君子嗟乎可爲讀易之法矣竊思理寓於事以事徵理則理愈顯而可據邦自束髮受書服習此經四十餘年每思史傳所載事實有

與爻義宛合者若繁徵博引連類比附勒成一書而卦爻之義愈覺印證詳明以爲漢魏以下注家林立宜有此本以家鮮藏書又聞見甚渺未之見也乙未秋遭鼓盆之戚移寓棉花巷內陋室數椽湫隘偪側至丙申四月以後亢陽爲厲殆不可支因日取易讀之不揣固陋思成夙志每讀一卦徵引數事伸解爻義俾事與理互爲發明庶幾經旨非托空言而聖人之言信而有徵讀者因經以證史因史以通經於持身接物之道有所參稽而歸於實用較冥索象數者其益於身心不已多乎故解釋各爻一遵朱子本義偶有與己意未愜者數爻而已積兩月餘而六十四卦俱畢分爲上下二卷名曰周易史證寓邸存書寥寥又以兒輩歸里悉摒擋巾箱中案頭惟前後漢書而已故所徵引兩漢爲多其中附會遷就知所不免擬再質諸博洽君子刪改就正或當代已有其書如

得寓目即以此覆醫說矣姑藏之家塾以俟焉

道光丙申七月朔日平陽彭作邦荷邨自序

周易史證

山右叢書初編

平水彭作邦

字對山
號荷村 手著

上經前

乾二二二

乾下
乾上

易首乾坤從開闢起義文王觀乾之象繫之詞曰元亨利貞蓋自有天地以後陰陽變化無非此四德之理終始循環充塞徧滿於兩間播於地爲五行賦於人而爲五常以至在外爲五事在內爲五臟皆是物也易以人事道陰陽象言乎象爻言乎變三百八十四爻隨舉一事以明其理象立於此而事應於彼如景之於形響之於聲故曰爻象動乎內吉凶見乎外然而其故何也四德之理日流行於陰陽五行之中人之起居動作日與陰陽五行之氣相推相盪其氣類之所感必肖其形以爲應動四體而見著龜非著龜之能前知特得氣之先而預爲之兆耳故曰天地設位鬼神成人謀鬼謀百姓

與能元雖列於四德而實貫乎四德之終始故曰統天天體物而無或遺仁
體事而無不在品物流形物之亨元亨之也各正性命利也保合太和貞也
皆元之爲也聖人乘乾御宇首庶物而安萬國一天之元亨利貞而已天以
健行而不息聖人以莊敬而日強故曰至誠無息易雖爲卜筮而設然卜筮
特易之一事聖人以爲寡過之書則以天道驗諸人事以審乎吉凶悔吝之
端故曰立象以盡意設卦以盡情僞繫詞焉以盡其言所以示人者切矣乾
六爻皆龍也特以時位不同故分而爲潛見惕躍飛亢六十四卦皆以時位
定吉凶也夫子於乾坤反覆申明其意讀者能於各卦引而伸之觸類而長
之則於易之理思過半矣潛龍勿用舊說云尹未聘而莘耕呂未載而渭釣
固合爻義然須知潛而稱龍則霖雨蒼生澤被萬物之具已裕於抱膝長吟
之日不患無位患所以立如或知爾則何以哉隱居以求其志潛時正大有
工夫非空空伏處草茅也第隱而未見行而未成是以君子弗用耳此之謂

龍德而隱君子依乎中庸遯世不見知而不悔用之則行舍之則藏人不知而不愠潛龍之德豈易及哉後來諸葛於隆中定三分之局王猛捫蝨談天下之務亦庶幾焉九二出潛離隱雷始發聲之時見龍已在田二爲臣位惠澤旁流海內蒙樂利之休矣故曰德施普也曰天下文明其德與飛龍同故曰君德也特居下位未能飛耳故又曰時舍也舊說曰伊周作相而利澤敷孔孟作師而教澤普固不愧爲大人然自皇帝六相舜之五臣文之四友武之十亂皆見龍也夫子稱其德曰庸言信庸行謹言顧行行顧言也閑邪存其誠克己復禮爲仁也善世而不伐無伐善無施勞也德溥而化博施於民而能濟衆也學聚問辨博學之審問之也寬居仁行寬則得衆仁能守之也此之謂龍德而正中故曰君德也三四皆人臣位故不言龍三居下之上又重剛不中故必旦明警惕然後可復於無過此湯武反之之學也陽性剛健故能自朝至夕乾惕不懈湯之聖敬曰躋武之敬勝怠於爻義爲合舊說云

放桐歸亳負屣復辟似未切夫子曰反復道也行事也與時偕行皆乾惕之意忠信進德主忠信崇德也修詞立誠有德有言也知至知終由定靜安慮以止於至善也不驕不憂爲上不驕爲下不倍也所謂乾乾因其時惕也以惕无咎非生於憂患哉九四離下乾而入上乾乾道乃革之時天命人心已有所屬但須時耳故爲或躍在淵之象此湯武應天順人尙未興誅伐之甲之時也舊說云舜禹南河陽城之避武王十三年之養晦正是或字之意夫子曰進无咎也自試也又曰君子進德修業欲及時也推廣或字之理盡矣大禹惜寸陰文王日昃不遑周公坐以待旦召公戒成王疾敬德皆欲及時也又何咎哉九五剛健中正以聖人而居天子之位唐虞之厚生正德三代之創制顯庸固爲物所利見矣然自古聖人開物成務皆在天之飛龍也天皇制干支地皇制三辰人皇分九區構巢以安生民而曰有巢鑽火以教熟食而曰燧人庖犧畫卦以書契易結繩作歷法制嫁娶神農嘗百草立醫藥

黃帝作舟車制貨幣教民蠶織衣被後世至今賴之夫子曰大人造也聖作物睹雲龍風虎之盛不可想見哉大人與天地合德高明配天博厚配地也與日月合明如日月之代明也與四時合其序如四時之錯行也與鬼神合其吉凶至誠如神也至先天而天弗違則幹旋乾坤造化在手闔闢從心所謂聖而不可知之謂神也上九亢龍有悔剛過之極盈而蕩滿則覆天道之常故曰盈不可久窮之災也秦政混一四海而侈肆无厭苻堅恃投鞭斷流之強而違衆伐晉隋廣縱欲懷諫而流連荒亡无位无民亂亡隨之非知進退存亡而不失其正之大人何以免於悔哉用九用六借乾坤以明六十四卦之例九六七八陰陽老少之數老變而少不變故用九六而不用七八物極則變天地自然之理也羣龍无首剛變爲柔書所謂平康正直詩所謂不競不綌者也故曰天下治也曰乃見天則天德不可爲首老子得之以爲知白守黑之學陽剛不爲物先劉伯升之見害於更始孫堅孫策之不以善終

皆首也讀乾之一卦於六爻發揮見各得乾之一體小德川流也於利貞者性情見收斂篤實積之厚而發之光大德敦化也要皆剛健中正純粹以精之德以貫澈乎始終聖人所爲時乘六龍以御天而天下平也與

坤

三三
三三
坤上 坤下

坤之德只順承天而已坤元亨卽乾之元亨乾之元不可見於坤之亨見之含宏光大品物咸亨坤之亨乾之元爲之所謂天施地生者也載華嶽而不重振河海而不洩飛潛動植各遂其性坤以厚德載物故曰德合无疆馬乾象牝馬順而健行坤足以配乾也先迷後得地道无成之義西南坤方故曰類行東北艮方則非其類也故喪朋乃終有慶坤作成物之義也安貞應地所謂安土敦乎仁也物之成形莫大於地萬物無不持載厚生之至也君子法之以脩德如蒙之果行育德小畜之懿文德否之儉德蠱之振民育德大畜之多識以畜其德坎之常德行晉之自昭明德蹇之反身修德升之慎德

積小以高大漸之居賢德進德之道不一而必以厚德載物爲德之至所謂
卑法地者此也夫一陰一陽之謂道剛柔交濟中正和平易知簡能配三才
而立極此不可偏主者也然陽舒陰慘陽生陰殺陽數奇而陰數偶陰多於
陽草木果少而葉多人類男少而女多自古治日少而亂日多君子少而小
人多聖人欲以人事挽回天運故於盈虛消長之際諄諄告誡示人以扶陽
抑陰之義庶幾人定可以勝天此聖人之微旨也初六微陰未盛卽慮及堅
冰之至夫子曰馴致其道又曰其所由來者漸矣天下之患莫大於以漸而
成其始萌也一夫制之有餘而姑息因循不以爲意迨至根深蒂固積重難
返賢人君子束手無策而天下事不可爲矣漢唐宦官之禍其明證也王安
石初執政呂誨獨言其不通時事上疏言大姦似忠大詐似信吳奎亦言嘗
與安石同領群牧見其護非自用所爲迂闊若一用之必紊綱紀神宗皆不
聽非不知履霜之戒者哉六二柔順中正坤之六爻惟二得坤道之純故爻